



Atassutip Inatsisartuni ilaasortaataat  
Inatsisartut Allattoqarfiat  
Maani.

### **Timmissat pillugit nalunaarutip naleqqussarneqarnissaa siunertaralugu sulinasuartitap sulinerata killiffia pillugu Naalackersuisunut apeqqummut akissut**

Atassutip Inatsisartuni ilaasortaataasa Augusta Salling, Ellen Kristoffersen, Kristian Jeremiassen, Thomas Kristensen aamma Godmann Rasmussenip Inatsisartut suleriaasianni § 36 imm. 1 naapertorlugu apeqquteqarput suleqatigiissitap timmissat pillugit nalunaarutip naleqqussarneqarnissaa siunertaralugu sulinasuartitap sulinerata sumut killinnera paasiniallugu.

Tamanna tunggavigalugu ima akissuteqarsinnaavunga.

Apeqqut imatut paasivara Atassutip Inatsisartuni ilaasortaataitai isumaqartut, suleqatigiissitap timmissat pillugit nalunaarutip allanngortinneqarsinnaaneranut kaammattuusiortussap sulini ima naammassiaartigissagaa timmissat pillugit nalunaarut allanngortitaq upernaap matuma ingerlanerani atuutilersinnaassalluni.

Naalackersuisulli suliami pineqartumi Inatsisartunit qanoq piginnaatinneqarsimantertik allatut isumaqarfigaat.

Tamatumunnga tunggatillugu 2007-imi Inatsisartut ukiakkut ataatsimiinneranni oqaluuserisassani imm. 102 (UKA2007/102) innersuussutigissavara, tamatumani Inatsisartut ilalermassuk Naalackersuisut tamatigoortumik inuttalimmik suleqatigiissitaliussasut 2008-p affaani siullermi timmissat pillugit nalunaarutip atuuttup allanngortinneqarnissaanut tunggavissaqarnerisooq kaammattuuteqartussamik. Taamaalluni Inatsisartut akueraat suleqatigiissitaq kingusinnerpaamik 2008-mi juunip naanerani kaammattuumminik tunniussaqaassasoq.

Oqaluuserisassap pineqartup aappassaaneerneqarneranit naqeqqaakkami atuarneqarsinnaasutut suleqatigiissitap 2008-mi juunip naanissaata tungaanut suliaminik naammassinninnissaminut piffissaqartinneqarnissaanik Naalackersuisut inasuteqarnerat Inatsisartuni partiinit uparuarneqanngilaq. Naqeqqaakkami atuarneqarsinnaavortaaq Knud Kristiansenip Atassummeersup maluginiaraa suleqatigiissitaq "ukioq 2008-p affaata siulliup ingerlanerani saqqummiussaqaarsinnaassasoq".

2008-30  
10. marts 2008  
Postboks 269  
3900 Nuuk  
Oq/tel +299 34 50 00  
Fax +299 32 47 04  
apnp@gh.gl  
www.nanoq.gl

UKA2007/102-p aappassaaneerneqarneranut akissuteqaat innersuussutigalugu nalilerpara Naalakkersuisut Inatsisartunit ilalerneqartut naatsorsuutigineqarsinnaangitsoq suleqatigiissitat suliainnik ima sukkatigisumik naammassinninnaasut piffissani piniarfiusinnaasuni allannguutaajunnartut 2008-mi upernaakkut atuutilereersinnaallutik, taamatullu aamma akissuteqaammi toqqaannartumik takuneqarsinnaalluni Naalakkersuisut piareersimasut suleqatigiissitap suliainnik 2008-p affaani siullermi naammassinninnissaanut Naalakkersuisullu tamatuma kingorna suleqatigiissitap kaammattuutaanut isummerlutik.

Inatsisartut Eqqissimatitsinermut Avatangiisinullu Ataatsimiititaliaata isumaliutissiissutaani takuneqarsinnaagaluarpoq 2008-mi upernaakkut piniarneq aallartitsinagu timmissat pillugit nalunaarutip allannguuteqartinneqarnissaa kissaatigineqartoq. Matumanili aalajangiisuvoq oqaluuserisap aappassaaneerneqarnerani Inatsisartut Naalakkersuisut akissuteqaataat ilalermassuk, tassani ilaatigut tunngavilersuutigineqarluni naatsorsuutigineqarsinnaangitsoq nutaanik malittarisassioortoqarsinnaanissaa 2008-mi upernaakkut atuutilereersinnaasunik.

UKA2007/102-p aappassaaneerneqarneranut akissuteqaammi takuneqarsinnaasut 2008-mi upernaakkut appaqassutsimik miteqassutsimillu misissuinerit ineneri pingaarutillit saqqummiunneqartussaapput, taakkulu suleqatigiissitap nalilersuinerinut ilaatinneqarnissaat pingaaruteqarluinnarpoq. Ilaatigut tamanna tunngavigalugu aappassaaneerinninnermut akissuteqaamminni Naalakkersuisut oqaatigaat misissuinerit taakku ineneri utaqqeqqaarneqartariaqartut timmissat pillugit nalunaarut allangortinniarnegartinnagu.

Taamaattoq suliassap naammassinissaa piffissalernerqarsimagaluartoq Naalakkersuisut siulittaasup aalajangiineratigut Timmissat illersugaanerit pillugu nalunaarut nutaaq nr. 5, ulloq 29. februar 2008-meersoq, Timmissat illersugaanerit pillugu nalunaarummik nr. 1, ulloq 21. januar 2004-meersumik taarsiisoq aamma mitit taateraallu piniarneqarfigisinnaasaannik sivitsuiffiusoq, akuersissutigaat.

UKA2007/102-p suliarneqarnerata kinguninguatigut Naalakkersuisut siulittaasuat aalajangiivoq timmissat, umimmaat, tutut piniagassallu mikinerit iluaqutiginiarneqarnerisa aqunneqarnerat Avatangiisinut Pingortitamullu Pisortaqarfiusimasumit (APP) Aalisarnermut, Piniarnermut Nunalerinermullu Pisortaqarfiusimasumut (APNP) nuunneqassasut.

Naalakkersuisut suliassaqarfiisa allangortinneqarnerisa 2008-mi januaarip aallaqqaataani atuutilereernissaat naatsorsuutigalugu APP suleqatigiissitap 2007-imi pilersinneqareerneqannginninnissaanik aalajangerpoq. Pissutsillu assigiinngitsut pissutigalugit suliassaqarfiit nuunneqarnerat aatsaat 2008-mi marsip aallaqqaataani timitalerneqarpoq, 2007-imi 2008-llu aallartinnerani naatsorsuutigineqarsinnaangitsumik. 2008-mi marsip aallaqqaataani timmissat iluaqutiginiarneqarnerisa aqunneqarnerat taamaalilluni APNP-p akisussaaffigilerpaa.

Suliassaqarfinnik allannguinerit imminni soorunami piffissami ikaarsaariarfiusumi Naalakkersuisut suliassaqarfimminni suliassanik sularinninnerinut sunniuteqartarput, neriuppungalu Atassutip Inatsisartuni ilaasortaataasa tamanna paasinnittumik tigussagaat.

Suliamili matumani aalajangiisuulluinnarpoq 2007-imi ukiakkut ataatsimiinnermi Naalakkersuisut taperserneqarmata timmissat pillugit suleqatigiissitap 2008-mi juunip naannginnerani suliaminnik naammassinninnissaannut. Taamaattumik Naalakkersuisut pingaartippaat suleqatigiissitap 2008-mi juuni naatinnagu suliaminik naammassinninnissaa. Aalisarnermut, Piniarnermut, Nunalerinermullu Naalakkersuisoqarfiup 2008-mi marsip aallartilaarnerani suleqatigiissitap pilersippaa ataatsimiigiqullugulu, 2008-mi juuni naatinnagu suleqatigiissitap suliaminik naammassinninnissaanik Naalakkersuisut aalajangererat naammassineqarsinnaaqullugu.

Ikinngutinnersumik inuulluaqqusillunga

Finn Karlsen

Aalisarnermut, Piniarnermut Nunalerinermullu Naalakkersuisoq